

Bou Lei pa Traha Lei

Elekshon ta nèt dilanti porta. Ta tempu pa suidananon di nos isla selektá esnan ku ta traha nos leinan. Ku esaki en bista, ta na su lugá pa nos pensa tokante nos leinan, esnan ku ta traha e leinan, i nos mes

Sin duda nos isla tin hopi lei ku ta bon. Ma mi ta preokupá pa ku leinan ku no ta kuadra.

Un ehèmpel klave di esaki ta algun lei di tráfiiko. E velosidat máksimo ku shofùrnann ta pèrmití pa manehá nan outo den “bebouwdekom” ta 40 i 60 otro kaminda. Ma e leinan aki ta eksistí na nos isla desde tempu nos kareteranan a haña asfalt pa promé biaha. Kon por ta ku outomobilistanan ta pèrmití pa kore 60 riba kamina di Yato Bako—un kaminda di tera—anto ni un kilometer mas rápido riba kaminda asfaltá pa Rincon?

Ademas, e bòrchi poné kantu di kaminda ora trabou ta tuma lugá tin un 15 pintá bunita riba dje. Pa ser realístiko, asta na pia por kore mas duru! Difisilmente outonan moderno por kore 15 kilometer pa ora. Ta klaro ku den mayoria kaso no ta pèrhudiká seguridat di e trahadó pa outomobilistanan kore mas rápido. Ma esei ta lei!

Pasobra nos leinan ta antikuá, mayoria hende no ta paga tino na nan mes...ku eksepsion di ora polis ta presentá. Esei ta algu serio! **Nos ta siñando nos puebel pa desobedesé lei!**

Konsekuentemente, no ta nada straño ku hende ku a kustumbrá di violá sierto lei, lo ignorá otro leinan. Ta fásil pa mira kon rasonamentu asina por guia na mas kriminalidat...

Ta esensial pa hende obedesé lei...tur lei. P’esei, **si un lei no ta sirbi, remplas’é ku un ku ta kuadra i sòru ku hende ta obedesé.** Ma ta inkorekto pa pèrmití leinan antikuá keda na vigor...kasi obligando hende pa siña desobedesé!

Kiko anto di esnan ku ta traha nos leinan? Meskos ku kualke otro suidadano, nan ta responsabel pa someté na e leinan ku nan—òf gobernantenan promé ku nan—a traha. Esei tambe ta e kaso pa polis.

Ma ku tur respèt pa lidernan di nos komunidat, mi ta preokupá pa loke mi ta opservá. Tin lei na nos islanan ku esnan den outoridat simpelmente ta ignorá. Por ehèmpel, prostitushon ta ilegal. Ma ta parse ku ningun ta hasi kaso i algun asta ke fasilidat e profeshon baho ku ta probá ta produsí mas aktividat kriminal. Ta igual ku aborto. Maske nos leinan ta prohibí un hende muhé di mata su yu dor aborto, esnan den outoridat ta “kijk door de vingers”.

I pió ainda, algun di esnan responsabel pa lei ta ignorá sierto lei. Na lugá di duna un bon ehèmpel pa tur suidadano, esnan den outoridat tambe ta surpasá e velosidat legal pa tráfiiko. Ademas, aparentemente tin hende riba lista di un òf otro partido ku ta usa droga ilegal! Imaginábo! **Hende ku ta kibra lei na un forma flagrante ke traha lei pa otronan!**

I kiko di nos komo suidadano? Palabra di Dios ta bisa kla ku un suidadano mester someté na leinan di su pais. “*Someté boso mes..na tur institushon humano, sea na un rei komo esun den outoridat, òf na gobernadónan...*” (1 Pedro 2:13-14). “*Laga tur hende someté na mes na e outoridatnan ku ta goberná*” (Romanonan 13:1). Nos tin deber pa obedesé e leinan di nos pais i respetá esnan den outoridat riba nos.

Ma den un demokrasia nos tambe tin e oportunidat pa selektá esnan ku ta traha nos leinan. P’esei e siman aki bai vota. Ma wak bon pa ken bo ta vota. No vota pa un persona ku e mes no ta hasi kaso di lei. Solamente esnan bou outoridat di lei ta digno di haña outoridat pa traha lei.